



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

India nungertemi BJP tamakok ngudaktsütsü: Rahul Gandhi

Nigeria tir inyaktsü Bola Tinubu shimogo



VOL. XX NO. 233 (ADOK 233) DIMAPUR TENTONÜ (MONDAY)

AAMI (JUNE) 05 2023

₹ 5.00

Amit Shah-i NH 2 lapoktsü mepishir

Imphal, June 4, 2023 (Agencies): Union home minister Amit Shah-i Deobarnü Manipur nung alirtem dang National Highway 2 mokdanga aliba agientsü mepishia metetdaksüogo.

"Manipur nunger dang Imphal-Dimapur, NH-2 Highway mokdanga aliba agientsü mepishir" ta Amit Shah-i ashi.

"Chiyungtsü, mozü, petrol/diesel aser tanga nungdakba nübortem atongtsü atema lenmang noktanga aliba lapoktsü mepishir" ta pai ashi.

Paisa civil society organizations dang tangatetep kati arutsü mepishio. "Asenok külemi longjem nung dang iba tobur tajung state nung tensa süngjemdaksütsü akok" ta union home minister Amit Shah-i ashi.

Manipur nung ita ka tema National Highway-2 (Trans Asian Highway No.1) mokdanga sülen June 5 nungi lapoktsü.

National Highway-2 mokdanga osang kecha maliasü saka mepetmesü adoka arundang iba lenmang nung gari senzüba anena liasü.

Union Home Minister Amit Shah-i tawa Kangpokpi district semdang dang highway nung traffic tiptema senzüdaksütsü asoshi mepishia liasü.

Pai mepishiba agizüka aser telok aika den sensaksemba sülen Committee on Tribals Unity Sadar Hills-i June 5 nungi anogo

tenet atema National Highway-2 lapoktsü metetdaksüogo.

Sorkari Kuki yimtenren tebilemtsü asoshi "Peace Mission" inyakba pusemba sayua Kangpokpi nung alirtem highway lapoktsütsü lemtetogo. Ajisiüka, iba mapang central forces-i meina essential commodities aser medical supplies dang bendaktsütsü, ta Committee-i ashi.

Anepdang 10:00 ako nungi nikongdang 2:00 ako tashi dang truck garitem senzüdaksütsü, ta parnokisa ashi.

"Lenmang mokdanga lapoktsüdang Meitei nungeri Kuki nunger aser yimtsüngtem nung ozüing alema mapa inyakra onoki iba lemtet meyipa reprangshitsü" ta Committee on Tribals Unity Sadar Hills indang spokesperson Rev. K. Sitlhou-i ashi.

Tang Manipur black market nung petrol litre nung Rs 200 agi ayoker, mozütem peria mangur, ATMs nung sen mali aser anogoshia dokantem ghonda ishika dang lapoker.

Taoba mapang jang seret ka nung Rs 30 agi yoka aliba tangbo seret nung Rs 60 kümogo. Aonsotsü jenjanga kanga tuogo aser piyaz seret nung Rs 35 aliba tang Rs 70 agi ayoker. Ano seret nung Rs 15 aliba nungi Rs 40 agi ayoker, entsü ka nung Rs 6 aliba Rs 10 kümogo, refined oil Rs 220 aliba nungi Rs 250 nungi 280 agi ayoker.

Nitish Kumar-i ayongba opposition senden thinener

New Delhi, June 4, 2023 (Agencies): June 12 nü Bihar yimtiba Patna nung opposition party tem senden ka amentsü aliba June 23 nü ang amentsü thinenergo.

Iba senden ya Bihar Chief Minister Nitish Kumar menden ser amentsüba liasü saka kechi atema thinen'ar memetetdaksü.

Ajisüka, osang kar ajanga Congress-i senden nung adentsü memulungba ajanga senden thinener ta ashi.

Congress party president Mallikarjun Kharge aser party lennir Rahul Gandhi na June 12 senden nung madentsü ta Congress-i ashi.

Iba senden ya Nitish-i Opposition tali longjemshitsü atema jatepba ama ajitetet. Tawa tu Bihar chief minister Nitish-i Delhi, West Bengal, Uttar Pradesh, Maharashtra, Odisha, aser Karnataka amala state tem sema Centre nung BJP sorkar anema party tem longjemtsü jembia liasü.

Nitish-i April 12 nü mezüing

Congress lennirtem den ajuruteper aser iba sülen Rahul Gandhi-i Nitish den senden amenba ya Opposition longjemtsü atema 'otsütsütsü mera' ka lir ta sangoktsü.

Nitish-isa Delhi CM Arvind Kejriwal, Samajwadi Party tanishir Akhilesh Yadav, Bengal CM Mamata Banerjee, Odisha CM Naveen Patnaik, Jharkhand CM Hemant Soren, NCP tanishir Sharad Pawar aser Sena (UBT) tanishir Uddhav Thackeray nunger den ajurutepergo.

Nitish-i Biju Janata Dal (BJD) tanishir Naveen Patnaik den ajuruteperba ajanga Puri nung Bihari pilgrims atema ali acre 1.5 angati ngua liasü. Ajisiüka Odisha CM Patnaik-i 2024 elections atema non-BJP opposition front nung adentsü tenangzükba kecha magi.

Lok Sabha election nung BJP madak takok angutsü ta Nitish-i MP menden 450 shi jangjateta lir aser Opposition senden nung parnok common candidate yoktsü atema olemteptsü.

Manipur lendong bushisüngdangtsü atema luden ka tentetogo



Manipur nung lisopurtemi New Delhi kübok Jantar Mantar nung 'Tribal Solidarity protest' ka agiba noksa nung angur (file)

Imphal, June 4, 2023 (Agencies): May 3 nungi Manipur nung mepetmesü adokba bushisüngdangtsü atema Ministry of Home Affairs (MHA)-i luden ka tentetogo.

MHA-i Gauhati high court nung taoba chief justice Justice Ajai Lamba lenisüba kübok züingsem asem agi akümba luden ka tentetogo.

Iba Commission of Inquiry nungsa Himanshu Shekhar Das (IAS Retd.) aser Aloka Prabhakar (IPS Retd.) na dena lir.

May 3, 2023 nü telok balala tsüingda mepetmesü adokba aser iba sülen nungi tesem balala nung raratepa aoba indang C o m m i s s i o n - i bushisüngdangtsü.

Parnokisa bangdakpurtemi mesüra nisung kari metokmeperi inyakba mesüra teinyaktsütem m e i n y a k b a t e m bushisüngdangtsü.

CBI-i Odisha train lendong bushisüngdangtsü

New Delhi, June 4, 2023 (Agencies): Odisha kübok Balasore nung train asem tsüktepba lendong bushisüngdang asütsü atema Railways Ministry-i Central Bureau of Investigation (CBI) dang asüngdangogo.

Hokolbarnü train lendong nung nisung 270 tema asü aser iba ya küm aika sülen India nung train lendong tamajungtiba ta züingshir.

"Tatalokba ajak angadanga sülen Railways board-i CBI nem bushisüngdang südaktsütsü shiogo" ta Railways minister Ashwini Vaishnaw-i osangbener dang ashi.

Iba lendong ya driver error aser system malfunction ajanga masü saka nisung kari asaa teka

Kija mesüra teloktemi ken o benoka alibatem den ano tanga ken o tem Commission-isa reprangdangtsü.

Commission of Inquiry-i ita 6 tsüingda Centre nem osang sangoktsütsü ajisiüka parnokiba mapang tsüingda interim reports agütsütsü akok.

Commission indang headquarters ji Imphal asütsü aser tiptema inyaka aotsü atema Centre sorkari Commissions of Inquiry Act, 1952 kübok ozüing balala amshitsü tashi agütsüogo.

Union home minister Amit Shah-i tawa Manipur semdang dang bushisüngdang asütsü metetdakja liasü.

"Tesüiba ghonda 24 tsüingda Manipur nung tensa süngjema dang süiogo" ta Security Adviser to state government Kuldiep Singh-i ashi.

"Union Home Minister Amit Shah-i mepishiba sülen Hokolbarnü prangpong-injang

140 tema arua agütsüba sülen ano tesüiba ghonda 24 tsüingda prangpong-injang 35 bener arua agütsüogo" ta pai ashi.

Manipur nung bomb 88 ngutetogo.

"Manipur nung tensa süngjema kümogo. Hokolbar nikongdang nungi ozüing alema inyakba kecha maliasü" ta Singh-isa ashi.

Central Reserve Police Force (CRPF) aser Army-i Manipur kübok lendenlen aser tenemlen lendangba tesemtem nung mita senzür ta paisa metetdaksü.

"Home Minister-i semdangba sülen nübortemi amaliteper. Public, civil society organizations aser lokti tanishirtemi administration den yaritepa yimjung atema inyaker" ta Kuldiep Singh-isa ashi.

Manipur kübok tesem teimba ka nung curfew ghonda 12 agienogo aser tensa tajungba kümard, ta paisa shisem.

aiba aser electronic interlocking system raksatsüba ajanga atalok asütsü akok ta Deobarnü Indian railways-i metetdaksüogo.

"Train lenmang indang 'electronic interlocking' ajanga iba lendong tulu atalok. Iba machine indang setting point melenshi aser ibaji koma aser kechiba inyak bushisüngdang osang nungi metettsü. Iba lendong atalokba tera aser ozüing alema inyakertem jangjaogo" ta Railways minister-isa ashi.

Signal maparen nung timtem ka adokba ajanga Coromandel Express-i khu abenba train ka anena alidak oa atsük. Idangji Coromandel Express taktangtem train lenmang tasembuba tashi nung oa anen aser Bengaluru-Howrah Superfast Express den

tsükteper ta Railways-i metetdaksüogo.

"CBI ya criminal investigation agency ka lir aser parnok mapaji railway lendong aser metokmeperitem masü saka ozüing alema inyakba bushisüngdangtsü atema lir. Iba ya Railway Minister minister kümzüka ayutsü atema inyakba mapa ka dang lir. Vaishnaw-i menden toktsütsüla mesüra pa ket nungi Rail portfolio agientsüla" ta Trinamool spokesperson Saket Gokhale-i ashi.

Deobarnü Odisha sorkari train asem tsükteperba lendong nung tasür 288 masü saka 275 liasü ta osang jangshitsüogo. Parnokisa nisung 1,175 yiruba osang metetdaksü.

HSLC tatidang nung GHS Saring nungi maneni 100 shilem pass asü



Dimapur, Aami/June 04 (TYO): High School Leaving Certificate (HSLC) Examination 2023 nung takok anguba kaketshir nem tenüngsang agütsüba sentong ka Government High School, Saring ajanga June 1, 2023 nü par school nung ayongzüka liasü.

Iba sentong nung Sentinenla, DEO Mokochung; N.Orenthung Kikon, EAC Longchem; Imkongwapang, Asst. District coordinator SAMAGRA, Japukong aser Saringyim nungi kaketshir lenirtem, Saringyim Village Council züngsemtem, arogo lenirtem aser tsürabotem dena liasü.

DEO Mokochung, Sentinenla-i iba sentong nung

jembidang küm pongu tashi iba school nungi HSLC tatidang nung takok noklang nung noklang shilem ngutetba atema kaketshir aser tesayur nem tenüngsang agütsü aser ibai takok tulu rongnung ka lir, ta ashi.

Tesayur temi temolung agüja sayuba, nüburtemi yariba aser kaketshir temi meranga azüngba ajanga takok ya angur, ta lai ashi.

Tesayur aser kaketshir nem tenüngsang agütsüba mapang EAC Longchem, Orenthung-ia asen tekoloki dang asen azüokteter, ta ashi aser kaketshir dang aseni asen tekolok amshira aseni bilemba nung takok angutsü ta teti bilemtettsüla, ta kaketshirtem ajungmesoa liasü.

Iba sentong nung Government High School, Saring indang Teacher-in-charge Imkongyapang-i tepela o jembidang, tesüiba küm pongu tashi iba school nungi HSLC tatidang nung 100 shilem takok anguba indang otsü shia liasü.

Küm shia kaketshir asoshi sarasademtsüba sentong ayongzüka asoshi pai Arogo dang pelaba lemsatepa liasü.

SMDC aser Village Council ajanga school nem osettsüset aser senotsü teyari agütsüba atema pelar, ta pai ashi.

Maneni tsürabor temi anepalua yariba ajanga pei tanurtemi takok angur, ta ashi.

Takok angur shia nem Saringyim Village Council ajanga senpet sen 5,000 agüja liasü.

Tir Yimyim nung teti ocet tapu balala zülua tazüngertem nem shisatsü agütsüsang, Changtongya nunger P.Renthy Jamir, June 04, 2023 anogo nung tasoba küm 80 ajungba takok aser tepela lemsateper. Tangang ano tainba kümerji, ano pa nungi shisatsü tarokba aser tesademba angutsü Tsüngremi maneni nübortem asoshi pa taküm moajangma.

- Yimozülur, Tir Yimyim.



Takok angutsü asoshi kaketshirtem kanga kumdangtsüla: Prof Glen Thong

Kohima, Aami/June 04 (TYO): Tang alima nung kanga sashia toktepa mapang takok angutsü asoshi Pro Vice Chancellor, Nagaland University, Kohima Campus, Meriema, Prof Glen Thong-i kaketshir dang kanga kumdanga alitsü ajungshia liasü.

Brehostibarnü Nagaland University Students Union (NUSU) Kohima Campus - Meriema pur 19th Parting Social sentong "Through adversity to the stars" omen nung ajemdaker RCEMPA Jotsoma nung alidang pai iba tayongzüka o ya shia liasü.

Nisung ajak dak tasü tait molungsentsü aser tejangraba lir, saka tia maka item sempet amshitsü molunga alir ishika dang, anungji jeret-pereta alirtemi temaba jenjang arishidang tetsükdaktsü nem mokokdaktsütsüla, ta pai ashi.

"Timtem mapang ajurutsü, saka azü, asentzü aser nüktzü yima nenoki temaba jenjang tongtettsü. Nü nükjidong tongtettsü atema nai mapang aser tashi bendanga agütsütsüla. Nai timtem aremra, na takum jangratema alitsü," ta pai ashi.

Degree den külemi danga skills tem bushitsüla, kechiaser sorkar sector nung mapa angutsü tasak kumogo aser tazüng ishika aliba atema nisung meyrirjang aikati tokteper, ta ashi.

Zünger aliba lanurtem business tenzüka nung yaritsü atema sorkar scheme aika lir, saka ochimashir temi pei

kinunger-adianu asoshi ajak agiatoker, ta pai sasa ashi.

Iba nung pai kaketshir dang pei indang kechi ali, iba atema nokdaktsüla aser raratsüla, ta pai ayongzüka.

"Ner tarutsü jenjang kumzüka ayutsü asoshi nenok karibo ochimashi system anema nokdaktsüla, kinunger adianu aser ashikülak mapa nungi pila alitsüla. Tashi aittsü asoshi tangatetba tajung aliba nüburtem aser lokti tentet den nenok lungjemtsüla."

Züngzüker aortem moaja jembidang, takum nung takok angutsübaji meimchir asoshi tongtipangtiba nükjidong asütsüla aser iba atema nai meranga inyakttsüla, ta Prof Glen Thong-i ashi.

"Nü takum nung temelatiba mapangji kindergarten nungi University tashi ya lir aser nai aji kanga tasak ama bilema liasü. Final semester tatidang sülen timtemji tenzüksü. Nai tanen makai tangshia aser meranga inyakttsüla," ta pro vice chancellor-i ashi.

Iba sentong nung NUSU Kohima Campus tir Chingsau-i tir o jemi aser züngzüker aortem tenüng nung NUSU KC information & publicity secretary tejenba Shahchoi B. Buchem-i jembia liasü.

Sentong nung Marlen Thoner-i temeja ken ka ajanga lokti ayongzüka aser NUSU KC social & cultural secretary P. Lopyoni Ngullie-i melepzüng o jembia liasü.

Dimapur nung nisung ka gari agi tsükset

Dimapur, Aami/June 04 (TYO): Dimapur Police ajanga sangdong ka nung ashiba agi, June 4, 2023 anepdang 7:00 ako meta 2 1/2 Mile, Dimapur nung Alto gari (Registration No. AS12J2489) kati arishi küm 50 shi tain mejangjaba nisung (meshitsüyar südi ta bilemer) ka dak asük. Yirur alisang ya iba

lendong atalokli temang anepalutsü atema Olive Hospital bushia anir ao saka doctor temi tasü bener aru ta sangdong.

Iba nisungba ya track pant sentsü tanak ka semer, tapubang achichilen neplusü ka aser achichi nükeptsü temalen neplusü ka keta lir.

Ozüng agi melaba maparen

ajak tembangba sülen tasü mang ya PM examination/jangjatsü atema District Hospital Dimapur Morgue nung yua lir.

Kibur/kinunger/tembar temi Officer-in-Charge, Traffic Control, Dimapur den Mobile No. 7085055028 ajanga tongteprateptsü mepishir, ta sangdong ajanga ashi.

Assam Rifles temi sentong balala ayongzüka



Dimapur, Aami/June 04 (TYO): Assam Rifles temi June 3, 2023 nü Government Middle School Phezoucha, New Secretariat Area nung azüngba kaketshir atema IG Stadium nung sentong ka ayongzüka liasü.

Iba mapang kaketshir temi saisapong sentong balala nung shilem agia liasü. Kaketshirtem asoshi ibai takum nung tajangshiba tajung ka liasü, kong parnok turf football ground nung football asaya aser synthetic track nung asemtepa liasü.

Iba sentong Govt. Middle School, New Secretariat nungi kaketshir 77 aser tesayur 18 arua shilem agia liasü.

HQ IGAR (North) kübok Assam Rifles, Kohima Battalion ajanga 9 buba International

Yoga Day bilemteta June 3, 2023 nü Christ King Higher Secondary School, Kohima nung azünger kaketshir asoshi YOGA SHIVER ayongzüka liasü.

Iba mapang kaketshir dang Yoga yimya balala sayu aser Yoga ajanga temang nung teyari anguba indang angazükdakja liasü.

Kaketshir dang Yoga Basic Steps indang video ka sayuba sülen "Yoga and its Importance in Today's Era" onük nung ajemdaker o jembia liasü.

Iba sentong nung kaketshir 38 aser tesayur ana dena liasü.

Maneni "Yoga Utsav of upcoming 9th international Yoga day 2023" nung shilem ka ama IGAR (N) kübok Assam Rifles temi Peren district kübok ARPS

(H), Jalukie nung June 3, 2023 nü YOGA CAPSULE ayongzüka liasü.

Kaketshir takum nung Yoga yimya amshidaktsü asoshi ajungmesotsü nükjidong nung iba sentong ya ayongzüka liasü.

Nisung ka takum nung tekolok aser temang anema lidaktsütsü asoshi Yoga posture aser tango sashiba yimya kaketshir nem angazükdaktsütsü mechi iba sentong ya ayongzüka liasü.

Yoga ajanga temang ainba, tashi aitba, temang atsüshiba nung yariba aser shilu-manem nungi jenbua aliba indang kaketshir nem angazükdakja liasü.

Iba sentong nung ARPS (H), Jalukie nungi kaketshir 65 aser tesayur 15 dena liasü.

Manipur nung prangbong 789 aser injang-bomb 10,648 pua lir

Imphal, Aami/June 04 (Agencies): Manipur nung tensa kanga tajungba nung azüokteta lir, ta Security Advisor Kuldiep Singh-i ashi.

State nung tesunep aser tensa tajungbai arudaktsütsü merangba nung tajangzüka lir aser tesüiba ghonda 24 tsüngta prangbong 23 ngutetogo.

Ibaji ajanga Union Home Minister, Amit Shah-i state semdangba sülen Manipur nung ngutetba prangbong 202, injang unit 252 aser bomb tabu balala 92 alitsü.

Tang tashinung prangbong 789 aser injang-bomb unit 10,648 tashi takok ngua pua lir.

Iba ama terenlok tasen liaka Imphal-Dimapaur National Highway-2 maneni mokdangba osangtem angashir, anungji nüngdakba oset bener aoba nung timtem ajurur.

Tensa kanga majungba

angateta Union Home Minister-i Manipur nung aliba nüburtem dang tangsa lenmang mokdanga aliba agienang, ta ayongzüka liasü.

Tweet ka nung, chiyongtsü, mozü, petrol/diesel aser danga nüngdakba osettem tetsükdaktsü makai agitettsüsa lenmangtem lapoktsü ayongzüker, ta pai ashi.

State nung tensa tajungba dangi arutsü asoshi Civil Society Organisation tem danga pai tongti shilem agütsü ajungshia liasü.

Manipur nung aliba nüburtemi iba temepishiba angaa Imphal-Dimapaur National Highway-2 mokdanga alibatem tekeratiba nung agientsü sorkar teimla lir.

Nüburtemi timtem ajuruba nung anisüngzüka agütsütsü mechi curfew talenba ajemtsüogo. Manipur nung valley region nung ghonda 12 tashi curfew agientsü aser anasa aliba hill district tem nung ghonda 7 nungi 10 tashi curfew mapang ajemtsür.

US defence secretary Lloyd Austin-i anogo ananü India semdang

New Delhi, June 04 (Agencies): Amongnü nungi tenzüka US defence secretary, Lloyd Austin-i anogo ananü atema India semdang; iba mapang nungji pai linük ana tsünga defence tsütsü amalitep jenjang tajungba akümsü atema jembitsü.

"Ni India-i meyipa arur aser ni Major Defense Partnership tajungba akümsü atema tongti ketdangsertem den senden amentsü," ta US defence secretary-i twitter ajanga metetdaksü.

Defence minister Rajnath Singh aser Austin nati Hombarnü senden mena fighter jet engines atema India den technology lemsateptsü aser India-i US defence major General Atomics Aeronautical Systems Inc dang nungi MQ-9B armed drone 30 dollar sen billion 3 agi alizütsü aliba atema jembitsü.

2016 küm June ita nung US-i India ya US atema "Major Defence Partner" ka lir ta sangdonga liasü, aser iba partnership kübok sepaitem indang hadir aser technology lemsateper.

Singh aser Austin natisa China-i Indo-Pacific aser Line of Actual Control nung ambangyima inyakba aser kiralongra amokmeren indanga jembitsü.

US defence secretary Austin-i tang agi tanabenbuba India semdang. 2021 küm March ita nunga pai India semdanga liasü.

Honibarnü Austin-i Odisha kübok Balasore nung train lendong atalokba atema tejashi lemsatepa pai twitter ajanga, "Balasore nung lendong tulu atalokba osang angashia kanga jashir. Tarutsü anogotem nung ni India nung tongti lenirtem tsüngdong ajurudang mangyim jashi lemsateptsü," ta metetdakja liasü.

Testüba küm ishika tsünga India aser US nati defence aser security tsütsü tezüngzüktep kar agiogo, aser item rongnung 2016 küm agiba Logistics Exchange Memorandum of Agreement (LEMOA) tezüngzüktep densema lir.

2018 küm linük anati C O M C A S A (C o m m u n i c a t i o n s Compatibility and Security Agreement) aser 2020 küm BECA (Basic Exchange and Cooperation Agreement) tezüngzüktep agia liasü.

putetogo, ta metetdaksü. Sinha-i, "Green signal anguba tetezü driver dang tejaklen lenmang azüngteta lir, anungji temelaba agüja aliba maximum speed nung train aotsü akok. Iba lenmang nungji melaba speed ji ghonda ka nung kilometer 130 liasü saka driver-i ghonda ka nung kilometer 128 dang keraa ania liasü, aser ibaji loco logs ajanga onoki jangjaogo," ta metetdaksü.

Bengaluru-Howrah Superfast Express aser Shalimar-Chennai Central Coromandel Express aser khu abenba train tsüktepbaji Hokolbar aonung 7:00 ako meta Balasore district kübok Bahanaga Bazar station anasa atalok.

Honibar aonung tashi nung iba lendong nung nisung 288 asüba jangjaogo aser hospital balala nung nisung 1,175 mongdar.

Bengaluru-Howrah Superfast Express train ji-a ghonda ka nung kilometer 126 kera ania liasü.

Sinha-i, "Train anapronglaji temelaba agüja aliba nungi tekübokba nung ania liasü anungji kera mani ta jangjar. Mezüng bushisüngdang ajanga signal system nung aibelenba jangjaogo," ta ashi.

"Iba lendong nung adenbaji train ka dang liasü aser ibaji Coromandel Express liasü. Coromandel Express jagi khu abenba train dak tsükoktsü aser train takdangtemji khu abenba train nungji insang bena liasü anungji train ji kanga taret liasü, anungji train tsüktepbaji ajanga passenger train dang mejungi kongshi," ta lai ashi.

Amongnü Railway Minister, Ashwini Vaishnav-ia, iba lendong atalokba tongti kuliji point machine aser electronic interlocking system nung timtem adokba ajanga liasü, ta metetdaksü.

Coromandel Express tsükokba ya driver tai ajanga masü: Railways



June 04 2023 nü NOCCI Business Park, Balasore district nung train tsükokba lendong nung asürtem noksa kinüngertemi bushia noksa nung angur.

New Delhi, June 04 (Agencies): Amongnü Indian railways-i, Hokolbarnü tsükokba Coromandel Express train ji kanga kera manii liasü aser train lenmang kati aitsü atema 'green signal' ngua liasü saka iba lenmang nungji khu abenba train ka anena aliba ajanga iba lendong atalok, anungji Odisha kübok Balasore district nung train lendong nung nisung 288 tsükseta asüba nungji train anisangi aibelenba mali, ta metetdaksü.

Railway Board nung tongti ketdangser ana- Principal Executive Director of Signalling, Sandeep Mathur aser Operation & Business Development nung züngsem, Jaya Varma Sinha nati iba lendong atalokba indang osang metetdaksü.

Tenati, mezüng bushisüngdangba ajanga electronic interlocking system nung timtem adokba ajanga iba lendong atalok asütsüa akok

aliba Javits Centre nung pai India nung den jembitsü. Honibarnü New York nung Indian Overseas Congress-USA-i ayongzüka sentong ka nung jembidang Rahul-i, "Onoki BJP tamakok ngudaksütettsü, ta Karnataka nung kuli sayuogo. Onoki parnok tamakok ngudaksüba dang masü saka meshimeshia tamakok ngudaksüogo," ta ashi.

India nungertemi BJP tamakok ngudaksütsü: Rahul Gandhi

New York, June 04 (Agencies): Congress lenir, Rahul Gandhi-i, Congress-i Karnataka assembly election nung takok anguba sülen maneni Telangana aser tanga state tem elections nunga BJP tamakok ngudaksütsü; Congress-i dang masü saka India nungertemi parnok indang tesempa tangatetba tamakok ngudaksütsü, ta ashi.

Rahul Gandhi-i Washington aser San Francisco semdangba sülen New York-i aruogo aser Amongnü Manhattan nung



June 04, 2023 nü Jantar Mantar, New Delhi nung Meitei nungertemi longkak aita yimyim ayim dang tangokba noksa nung angur.

India-Pak ken o mejembi tashi Kashmir tensa majungtsü: Farooq Abdullah



Srinagar, June 04 (Agencies): Amongnü National Conference Tir, Farooq Abdullah-i, Kashmir nung G20 ayongzüka agiba ajanga tourism majangzüksü; India aser Pakistan nati ken o jembia Union Territory ken o melatet tashi Kashmir nung tensa tajungba makümsü, ta ashi.

Nüburtemi shimtetba sorkar ka maliba agi Jammu & Kashmir nung kanga takoksa ngua timtemer, ta taoba mapang chief minister, Abdullah-i ashi.

Srinagar nung osangbenertem den jembidang pai, "Item linüktem nungi lenirtem aruba ajanga tourism tsütsü tajangzüik angutsü asü ? Yangi tensa tajungba maküm tashi aser linük anati tarutsü Kashmir atema ken o jembia melatet tashi ibaji mataloktsü," ta metetdaksü.

Srinagar nung G20 senden aliba ajanga Kashmir tajangzüik angutsü asü?, ta asüngdangba langzüdang pai, "Asenoki tajangzüik nguogo. Küm aika gari lenmang mejungi aliba yanglushiogo. Jaratem nung rong tepogo aser street lights yanglushiogo, anungji asenoki iba nungjagi item tajangzüikbo nguogo," ta ashi.

J&K nung nüburtemi shimtetba sorkar maliba dak sendakba nung Abdullah-i, "Democracy ya nüburtemi shimtetba sorkar aliba ajanga dang ataloker. LG ka aser pa indang advisor kati dangbo state ajak mereprangteter. Kechiyong MLA temi peipei tesem repranger," ta ashi.

Srinagar nungi Lok Sabha MP, Abdullah-i, assembly election kodang agidir agiaka par party renema dang lir, ta ashi.

Odisha nung train lendong dak sendakba nung pai, "Nisung 300 dak tema süogo aser noklang aika yiruogo. Iba tatalokba ya jungjungba bushisüngdangtsü nüngdak," ta ashi.



TIR YIMYIM YIMOBILEM (EDITORIAL)

DIMAPUR TENTONÜ, AAMI (JUNE) 05, 2023

Alima Lipuküm anogo

Tanü ya alima ajunga nung alima tzü mopong meraksai kumzuka ayutsü atema ajungshitepa amongba Alima Lipuküm Anogo (World Environment Day) lir. Taküm kum iba anogomung atema shimtetba omenji Plastic-i alima menentsüba koktettsü lenmang (Solution to Plastic Pollution) ta agüja lir. Atangji, asenok dangi plastic osettem arur mapang talangkbo masü saka plastic agi yangluba osettem ya jenjang talang aser asenok mapa aika onsara ayonga kumdaktsür. Tatsüba agi, akhidangbo shishilembadaki aonsutsü alii aodang yangku tazung bener ao saka tanü asungbo yangku bener aotsü nungdak madoker, onsara tayong aser tezüba, kechiyong dokan nung aseni aliba yari kechisarina enoka bener aotsü atema plastic agi yangluba polythene bag agütsür. Aji oda, anogo shia nisungtemi shishilembadak nungi polythene bag bener aobato janaona kumdaktsür mashi mashi nung endoker. Item jagi asenoki meteta aser memeteti arem aser ayong asünger. Aji dang masü saka asenoki anogo shia lokti nung amshiba plastic tzü bottle tila, plastic auso aser marok, jamos aser fork amala plastic agi yangluba osettem zünger mezüngma amshili endokli ta asubatem ya kakat aser süngotutem ama masü, plastic-bo ali kuma maor, anungji itemji alima asoshi tzü mopong menendaktsür akümer, kechiyong item jagi alijak nung süngdonglidong memeidaktsür aser tzü telong nung taküm shirurutem taküm melitetsüsa nangdener. Atangji, item plastic ajanga takoksa aser timtem angubaji asenoki meteta lir saka temeimer o temeimer na kidong süaka mepilatet ama , asenoki plastic mamshi maremer, kechiyong onsara ayongra. Ajisuaka, alima nung ya asenoki asen ajung asaa dang inyakra aser asen ayongba apia dang lira asen lir asen sülen arurtembo alima nung tali majung kümer asütsü. Ibaji bilema, yashi tashi asen tsüraburtemi chinüaka machi aser aginüaka magii odang anünga toktsüba sobaliba tajung aika lir, itemji tanü alirtem asoshi bilema wazüka toktsübatem asütsü. Kasa tangatetba nung tanü alirtemia inyakttsü melena ali tema aser telong nung akaba rongsentem ajak agiteta agimar plastic agi alima, tzüim aser ayong ajak nembanga toktsüra, asenoki asenok chirnur aser semchirsemnurtem asoshi alima agi kotak mesüka yanglutsütsü melen alima nung molumi yanglua toktsür aoer asütsü. Alima tzü mopong merüka shitak ayutsü atema plastic agi yangluba osettem mamshiba dang masü mesüra amshiyonga kumdanga amshiba dang masü asenoki inyakttsüba mapatem aika lir. Item rongnungji tang amai kanga tatsük mapang lemidang, asenoki alima nung tatsük ajema kumdaktsütsü teinyaktsü temela aika lir. Atangji, süngdonglidong atemba mapa yaa ka asütsü saka ajibo tang taginübo memetet, anungji tangsa tang asen alidak aseni akok alima atsükba jenjang ya ajema kumdaktsütsü asoshi akok tashi asen kidang electric power ajema agitsüla. Tetezü, kidang kanga nungdak maliba electric bulb-tembo metsükloktsüla, iba jagi alima mekongdaktsüba mapa nung tuluka yaritsü. Ano, alima mekongdaktsütsü atema asenok ajaki inyakttsüba mapa kaji, akok tashi asen kija senzütsü atemabo asen gari mebeni, kokra, tetsung agi jajatsüla mesüra nübortem külemi jajaba public transport bus, train aser auto rickshaw ama nung senzütsüla. Joko, nisungtemi amshiba gari nungi adokba tatsük agi alima lema kumdaktsüba meteta, alima aika nung nübortem dang totzü tsüka jajaba garitem melena amerlongtsü (bicycle) nung jajatsü ajungshir. Atangji, tenem nung alirtem asoshi amerlongtsü amshitsüba ya kangabo nungdak madoktsüa akok saka lenden lima alirtem asoshi amo amerlongtsü amshiba ajanga tzü mopong dang masü saka pei temanga dena tajungba kumdaktsütsü. Aji oda, tang ama tatsük mapang, tatsük marem anü nungsen jembia kazütsü agibo, asen alidak aseni alima mekongdaktsütsü atema aseni bilemba aser inyaktetba mapa ka danga inyaktetra, aji agi alima kumzüksü. Itemji bilema mapa kuma inyakba anogoji tanü 'Alima Lipuküm Anogo' ya südaktsüdi.

OLEMSABANG

MOATSÜ ASER TSÜNGREM-MONG BENJONG YA WAZÜKA AYUTSÜLA

~ L.Kika Pongener

(Yashi adok nungi...)

Ajisuaka, Aor yimtsung ajunga nung liromedema amungtsü atema moatsü-ji May ita 1-3 tashi amungtsü aser tsüngrem-mongji August ita 1-3 tashi amungtsü atema, Aor tashitemeteter aser kaketshirtemi ajongshia bangzünga lemtet, aser iba lemtetbaji Aor yim ajaki mulunga agizüker, tanü tashi liromedema munga arur. Aji oda, limapur suaka otsüla oboula nungeri teyanglur tsüngrem kabosa lir ta amanga aser külema, temoatsü meshia aser tenungsang agüja munga aru. Tanü Khristan yimsu agizüker külen-a iba den mesuktepa arogotem ajak nung alu rozüker külen pei-i züsentetba aser pei akaba tajungtiba nungi Tsüngrem nem tenungsang agütsüba (Thanks Giving) sentep sentong tajung yanglur amunger. Aji oda, otsüla oboula nunger limapur mapang nung suaka, parnok tangatetba yari parnoki amangba aser külemba tsüngrem tang temoatsü meshia aser tenungsang agütsüa longsotepa pelatepa munga aru. Aser Moatsü ya talisa azünglen alirtemi kanga metsüngareta munga aru, aser Tsüngrem-mongji ongpang len alirtemi kanga metsüngareta munga aru. Moatsü mapang nung azünglen alirtemi tzüla ayong adener aliba kintem asen tembartem ancha jaoka longsotepa pelatepa amunger. Iba Moatsü mapang asen tsüraburtemi ki maktepa piya mejemtsü den mayongtsü tajung mayongtepa jemtepa, naklotepa, longsotepa, tushitepa, yartsüngsangtepa pelatepa munga aru. Ano talisa aier asangurtem iba Moatsü mapang ajurutepa metettepa, tejak-shiotepa, kibalembutsü ani-asüngtepa lia aru. Ano aji dang masü, Moatsü dang achitsü atema alu zünger zünga-zünga nupoyok oa sen aa- ayu, aser sen jagi Nashi Ak alia Moatsü yatinep zünger tambusang kidang, iba Nashi Akji tepseta chiyunga-jema longsotepa pelatepa kazür külen, zünger shia shi lema bener senshir. Yamaji Tsüngrem-mong mapang nunga otsüla oboula nunger ki maktepa, piya mejemtsü den mayongtsü tajung mayonga jemtepa pelatepa munga aru. Tsüngrem-mong mapang aier asangurtem sobaliba asaya tapu balala, arr attsütepba, shizung tsüktepba, Sungküm küra agi tetsung jajatsü yanglur züktepba, talungtsü yanglur iba nungji mener attsür arishitepba, longmi talang songa yur talak nungji shi bangnem iloka yur shibai tamasa longmi nungji sepa-sepa tur agizüktedir, iba bangnemji pa meyong/pa agitsü ta toktepba, sobaliba asaya tapu tapu asaya-a longsotepa pelatepa munga aru.

Yamaji limapur putu nung parnok libaliro achi-ajemba yimya ajidang asüji, iba amaji chiyunga-jemtepa pelatepa longsotepa munga aru. Par putu nung parnok asoshi iba nungji kecha tashishitsü mekai tai temenen ta mezüngshi-i lia aru. Aji oda, otsüla oboula nunger aluyimer dang suaka, tsük chen sunga tokoka yur, kika-suchir taka-taiter aika liasü aser ano sensakertema aika tang liasü. Anungji takartemi sensakertem nem tsükdem agüja chiyungdaktsü, sensakeri takar dang akümstüba tenya-ashi angaa tenzüka aru, aser takartemi sensaker dang asü-anguma kati ka züngshitepa, meimtepa lia aruba sobaliba tajung bentshia lia aru. Aji oda, par putu nung parnoki kechi aki-alu mapa inyaker mesura arem nung yata-mentar iba nungji temoatsü lidakjang ta, aser par nem moatsüba nungi par akaba yari aser pei-i züsentetba tajungtiba nungi parnoki külemba tsüngrem nem tenungsang agütsüa munga aru. Kodang oboula Dr. Clerk-i asen limai Yisu yimsu osangtajung bener aru, aser asen otsüla oboula nungeri iba yimsuji agizüker, tamangba yimsu melenshia aodang, tesasatsüka asen tsüraburtemi aibelena angateter, iba Moatsü aser Tsüngrem-mong amungba ya limapur amongtsümong ka amai endoka-adok, aser mapang ka nungbo tamangertem-ibo iba benjong ya mamungtsüla-a ta-ka ashishitepa aru, aser iba tangatetba nungji Moatsü aser Tsüngrem-mong benjong ya Aor yimtsung karibo tanü tashi memungi lia arua alitsü sudi. Asenoki asen sobaliba aser tamangba yimsu ana ya balala bendanga angateta bentshitsu, saka sobaliba bentshidang tamangba nung aibelen masütsüla.

(Maneni asung adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

K-LOVE Fan Awards sentong nung Khristan kentener temi award angu



K-LOVE Fan Awards sentong nung For King & Country-i ken atandang tangokba noksa nung angur.

Nashville, June 04 (Agencies): Nashville, Tennessee nung 10buba K-LOVE Fan Awards sentong nung Khristan rock kentener telok For King & Country-i Artist of the Year award angu aser osangtajung kentener tema- Lauren Daigle-i Female Artist of The Year aser Brandon Lake-i Male Artist of the Year award angu.

For King & Country telok nung züngsemtem adianu Joel aser Luke Smallbone nati CCM artists Matthew West, Phil Wickham, Steven Curtis Chapman aser Tobymac nung madak takok ngua Artist of The Year award angu.

Brandon Lake ya Maverick

City Music collective nung züngsem ka aser Charleston, South Carolina nung aliba Seacoast Church nung worship pastor lir; paibo award asem-Male Artist of the Year, Song of the Year aser Worship Song of the Year awards angu.

Khristan osantajung kentener, Lauren Daigle-i Anne Wilson, Brooke Ligertwood, Katy Nichole aser tangartem madak takok ngua Female Artist of The Year award angu.

Group of the Year Award MercyMe-i angu. Iba telok nung tongti kentener, Bart Millard-i, Christian music industry nung küm 30 shi inyaka arudang parnok sapur aika akümba ajanga pai ajemalua

pelar, ta ashi.

Phil Robertson aser Jase Robertson nati Podcast Impact award angu. Tena indang podcast "Unashamed" ministry ajanga nisung noklang aika Khrista dangi anir aruogo.

Worship artist Wickham-i Book Impact award angu.

June 2 nü K-LOVE Fan Awards ya CAIN telok nung adianu aseme ketdangsüa agi. Iba sentong nung Colton Dixon, Gabby Barrett, Mac Powell, Jason Crabb, MercyMe, David Leonard, Katy Nichole aser Big Daddy Weave nungeri ken tena liasü.

TBN-i June 2 nü iba sentong sayua liasü aser June 10 nüa sayutsü.

France nung Evangelical Arogotem aser Khristan tem renlokdar

June 04, 2023: National Council of Evangelical Christians (CNEF) indang report ka ajanga France nung Evangelical Khristan Arogotem kanga renlokba osang metetdaksü.

Küm pongu tejaklen France nung alir 29,000 shia atema Arogo kaka dang liasü. 2017 küm France nung evangelical Arogo 2,521 liasü saka tanübo Arogo 2,700 dak tema lir.

1970 küm nungbo France nung Evangelical Arogo 769

dang liasü, ta CNEF-i metetdaksü.

Tesüiba küm 50 tsüngda France nung küm shia evangelical Arogo 35 shi dang renloka liasü saka tangbo küm shia Arogo aika renloker.

Evangelical Arogotem rongnung teimtibaji Assemblies of God France lir (Arogo 530), iba sülen tanabubaji Independent Arogotem (308) lir.

Evangelical Arogotem renlokba dang masü saka

Evangelical Khristan nütsünga kanga renlokdar. 2017 küm France nung evangelical Khristan 650,000 liasü saka tanübo evangelical Khristan nütsüng 745,000 dak tema lir.

CNEF-i ashiba agi, 1950 küm nungi tenzüka tang tashi nung France nung evangelical Khristan nütsüng arenbaji 15 ben agi teimba renlokba lir.

France nung denominational group mesüra federation balala nungi Arogotem shilem 70 bo CNEF nung züngsem lir.

Iraq nung Khristan meyirjang aika tang tashi jenshia lir: USCIRF

June 04, 2023: USCIRF-i küm shia Iraq nung Khristanem reshikangshiba osang tejangja report agütsür aser tang tesüsa report nung shia aliba agi, tang tashi Iraq nung Khristan meyirjang aika jenshia lir, ta International Christian Concern (ICC)-i metetdaksü.

Kasa report nungsa Khristanem atema osangtajunga kar sangdonga lir.

"KRG Prime Minister, Masrour Barzani-i Erbil district nung Khristanem aika aliba tesem Ankawa nung nüburtem nem tashi tulu agütsüogo. Germany sorkaria rara mapang

ozüing alema inyakba mapatem atema ISIS züngsemtem anema inyak tenzüko," ta report nung shia lir.

Ajisüaka Iraq nung Khristanem maneni reshikangshiba ajanga aika tang tashi prokshia lir.

Mapang shia Iraq nung ISIS kiralongrartemi timtem agütsür, aser ibaji ajanga Khristanem densema nüburtem pei kidangi meyipa aotsü atema tsübur, ta report nung shia lir.

Iba dak alia Popular Mobilization Forces (PMF)-i mapang shia gari lenmang mokdang aser ibaji ajanga Khristanem Nineveh plains

nung pei kidangi aotsü tsübur.

Ano Turkey sepaitemi anünglen nungi northern Iraq amaker aser ibaji ajanga Khristanem densema minorities nüburtem pei kidangi meyipa mouteter, ta kasa USCIRF report ajangasa metetdaksü.

Küm 10 tejaklen ISIS kiralongrartem merenba sülen tensa süngjemba mapang nungi tenzüka Iraq nung nütsüng ajema aliba nüburtem pei kidangi meyipa aotsü bilemer saka tensa junga mesüngjemetba ajanga tang tashi Khristan meyirjang aika jenshia lir.

ANO GO ABEN TSÜNGREM DEN

Anema Apusoba Nungi Adokba

T. Ken 107: 9 - 15

Tsüngremi mulungba aser Pa o anema Pa leman nungi pilaa aobaji lendong lir. T.Ken 107 nung item nübur lendong indang ashir. " Kar tammang nung aser tasü akhüm nung, timtem-toushi aser merang agi alener mena lir. Parnok mulungjang mapa tamajung inyakba agi kokrok dakja liasü; parnok lao, aser teyaritsü shinga maliasü" (t. 10,12). Tekong 11 nung kechiba ya atalok iba indang ashir: " Kechiaser parnoki Tsüngrem O anema apuso, aser Tematiba shisa tajung sensatsü." Tsüngremi mulungba aser Pa O anemer ajak iba timtem tia yagi aitsü- tammang, tasüba, aser teimla makaba tiai aitsü. Sentsüwangshi leman nung masü, tammang ongken aser talenba, aser tasü akhüm lenden nung parnok tsüktsü. Nübur ashir, " Ni kü mapa ni mulungba nung inyaktsü." Tsüngremi asenok nem obendang tulutiba agütsü baji pei leman nung pei mulungka aliba nung agütsür. Pauli Rom 1: 18- 32 nung item tekümdangtsü ajak ashir. Pa anemertem dang Tsüngremi ashir, "Nenoki item tetuyuba nung oner asü? Junger, ni nenok mesongtemtsü, saka iba nungi adokbaji ni memelenshitsü."

T. Ken 107 nung Tsüngremi mulungba aser Pa o anemertemji amang, tasüba aser teyimla makaba nung atemtsü ta ashi. Saka parnoki Pa dang ayimten aser Pai parnok kümzük. Tsüngrem taochiji kodanga temenu mali. Item nisungtemi ama nai Tsüngrem dang ayimtentü akok. " Idangji parnok timtem nung parnoki ayimten, aser Pai parnok tejashi nungi kümzük. Pai parnok amang nungi aser tasü aküm nungi anitet, aser parnok talenba rakdangtsü" (t. 13,14). Parnoki tesangwa, taküm aser nüji agizük kechiaser parnoki Kibuba dang aja.

Tsüngrem anema apusoba angatetsü tenüngdaksü. Nai aji angatetra, Kibuba dang jang. Pai na kümzüktsü. Idangji nai " Pai ajungba asoshi, aser nisung chirtem dang Pa tesüngmangtsü mapatem asoshi Kibuba tenüng asangtsü" (t. 15).

Nicaragua nung sorkari Arogotem indang bank accounts nokdang

June 04, 2023: Nicaragua Arogo densema Arogo ajak linük nung sorkari linük tesem indang bank accounts shibangtsüogo, ta metetdaksü. Bendangleni jena oa alir putir kati, "Linük nung Arogotem reshikangshiba ya atangji. Arogotemi raraba hadir amshir ta tai tonglokja liasü aser tang Arogotem senotsü agi timtemba mapang nung senotsü lenmang nokdang," ta metetdaksü.

Linük nung bank ketdangsertemia Nicaraguan bishops' conference aser Cardinal Leopoldo Brenes of Managua dang Arogotem indang bank accounts osang tejangja sayuang ta tuyuogo, ta May 27 nü National Police-i metetdaksü.

National Police-isa, linük anema inyakba ken otem nung aija alirtem meyong bank accounts ozüing alema amshir aser ozüing alema bendanglen nungi sen aiter, ta metetdaksü.

Police sangdong ajanga bank accounts shibangtsüba Arogotem memetetdaksü saka linük nung osangbenertemibo linük tesem ajaklen Managua

Arogo indang bank accounts shibangtsüogo, ta metetdaksü. Bendangleni jena oa alir putir kati, "Linük nung Arogotem reshikangshiba ya atangji. Arogotemi raraba hadir amshir ta tai tonglokja liasü aser tang Arogotem senotsü agi timtemba mapang nung senotsü lenmang nokdang," ta metetdaksü.

Taküm February ita nung Bishop Rolando Álvarez-i linük security anema inyak aser olulu prok ta aija küm 26 tepuokdak ayutsü obendang agüja liasü. May 20 aser May 22 nüa putir ana- Eugenio Rodríguez Benavides aser Leonardo Guevara Gutiérrez na apuba sülen Caritas chapter dak sendakba nung tena anema bushisüngdangdar.

May 24 nüa pastor, Jaime Iván Montecinos puogo.

Tang Arogotem indang bank accounts nokdangba ajanga Arogotem aser ministry mapa balala kanga timtemtsü.

AO OSHI ANGAZÜKDAK: TANÜ ANGAZÜKTSÜBA OJANG



Rangdang

(v) nok mesüra süngrangtsü agi ana aküm (cut into two or more by knife or saw)

* Mapa inyakertemi süng tuluka süngrangtsü talang amshia **rangdong**.

Rangdong

(n) süngküm tila (a type of reed pole)

* Otsülai **rangdong** amshia an meindok.

OLONG PAITEP # 6536

| | | | | | | | | | | |
|----|--|---|----|----|--|----|----|--|----|---|
| 1 | | 2 | | 3 | | 4 | 5 | | | |
| | | | | | | | | | | |
| | | | | 6 | | | | | | 7 |
| | | 8 | | | | | | | | |
| 9 | | | | 10 | | 11 | | | | |
| | | | | | | | | | | |
| | | | 12 | | | | | | 13 | |
| | | | | | | 14 | | | | |
| | | | | | | | | | | |
| | | | | | | | | | | |
| 16 | | | | | | | 17 | | | |

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S ___ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzuma nung senzüba - (5)

OLONG PAITEP # 6535 TELANGZÜBA

TIPIEN :

- 2. Bangsemo, 6. Tiptem, 8. Jen,
- 9. Talila, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.

Agüja aliba noksa nung meputepi aliba 12 bushiang



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tripura nung NLFT züngsem 6-i BSF tsüngdang temai adok



Agartala, June 4, 2023

(Agencies): June 4, 2023 nü National Liberation Front of Tripura (NLFT) züngsem tasen 6-i Border Security Force (BSF) tsüngdang temai adok.

Temai adokba telungpurtemji Ramanjoy Tripura, Khorsamohan Tripura, Madan Mohan Tripura aser Alajoy Tripura nunger lir aser parnok ajak ya Wakhiram Roajapara nung alirtem lir.

Ano, Tripura kübok Dhalai

nung alir Meturam Tripura aser Barmita Tripura nati temai adokogo.

BSF-i telungpurtem anema mapa tajung inyaka arur aser parnoki telungpurtem temai adoktsüsa mapa inyakteta arur.

NLFT ya Tripura nung telungpur telok ka lir aser parnoki ozüng alema mapa balala inyakyonga arur.

May 29, 2023 nü Border Security Force (BSF) sepaitemisa Tripura nung

Myanmar nungi bener aruba nashi 86 apu. Iba dak sendakba nung nisung 18 apu.

"Tripura-Mizoram arrtsü anasa Assam nungi Shiblön-gi Myanmar nungi bener nashi garitem ajanga abentsü osang ka May 28, 2023 nü angazükba sülen BSF-i garitem mita repring. Idangji gari 20 nung nashi bena aliba sot aser ozüng alema nashi shibelenba atema nisung 18 apu" ta AR sangdong ka nung metetdaksü.

Manipur nung Congress MLA kidang mi senoktsü

Imphal, June 4, 2023

(Agencies): Manipur nung June 4 nü MLA ka indang ki rondoktsüogo. June 4 anepdang 2:30 ako meta Kakching district kübok Sugnu nung yimtsüng ana nung mi senoktsü.

Mejangjaba nisungtemi MLA Ranjit'er ki nung mi senoktsü. Pa ya Indian National Congress züngsem ka lir.

June 3 nikongdang 4:30 ako meta nisung telok kati Sugnu Bazar Mahila Congress building nung Manipur MLA pezü sota ayu. Par pezü rongnung Ranjit

ya dang non-BJP MLA liasü.

MLA pezü ya Minister Y Kemchand lenisüba kübok liasü aser nisung telok jagi Kemchand-i Chief Minister N Biren Singh den ajurutepi aotsü temelaba agütsü. Parnoki Sugnu nung aliba Assam Rifles tesep tangaleni belentsü atema mepishir.

Union Home Minister Amit Shah-i Kuki telungpurtem dang Suspension of Operation (SoO) indang ground rule alema meinyaktsü tetuyuba agüjaka Kuki telungpurtem June 3 nü

tesem balala nung civilians dak injang khaloktsü.

June 3 nü Kuki nunger telungpur ta temulung melemi bilemertemi civilians dak injang khaloktsüdang nisung 15 yiru. Parnok ya Regional Institute of Medical Sciences (RIMS) nung anepaludar.

Iba atema mangyanga Phayeng aser Kangchup Chingkhong nung mapa lemezüka aliba Manipur Rifles aser state police personnel-i ghonda 4 tema telungpurtem den khatepa meindok.

Assam nung totzü jenjang atur; Petrol litre nung Rs 97.54 akümer

Guwahati, June 4, 2023

(Agencies): Assam nung totzü company temi June 3, 2023 nungi petrol aser diesel jenjang nung poisa 50 tuogo.

Iba sülen Assam nung petrol litre nung Rs 97.54 aser diesel

litre nung Rs 90.23 kümogo.

"Totzü jenjang tulialuli ta asür kechiyong dynamic fuel pricing system nung ajemdaker totzü jenjang repringshir aser mapang shia melenshir" ta Guwahati nung petrol pump kibur kati ashi.

May 31, 2023 tashi nung

Assam nung diesel litre ka indang average price Rs 89.84 liasü aser iba ya ita ka tsüngda 0.57% atuba lir. Külen petrol litre nung Rs 97.04 aliba nungi Rs 97.54 kümogo.



Mizoram nung Assam Rifles sepaitemi Rs 44 lakh alang pangolin scales seret 44 apuba sülen agiba noksa anur. Champhai district kübok Myanmar den anasa anasa aliba Zokhawthar-Melbuk road nung AR sepaitemi pangolin scales bena aliba apu.

Russia nungeri Dnipro amakba mapang nisung ka asü, 22 yiru

Kyiv, Aami/June 04 (Agencies): Ukraine linük tiyonglen Dnipro yimti nung Russia nungeri tayimtsü amshia amakdang tanur pongu densema nisung 22 yiru, aser arishi küm ana tanur tetsür ka asü, ta ketdangsur temi ashi.

Honibarnü Dnipropetrovsk indang regional governor Serhiy Lysak-i ashiba agi, nisung aliba tesem nung amakba sülen yirua aliba tanurtem rongnung par asem kangasa sashia yirua lir.

Nisung 17 mozü kidang anepalua liasü, ta pai Telegram nung ashi.

Osang balala ajanga ashiba agi, Pidhorodnenska ta sür tesem ka nung nisung pezü ki teraksa nungi atsütet.

Ano tanur ka tang tashi magiteti lir südi, ta Lysak-i ashi.

Social media nung osang ka ajanga ashiba agi, Russia nungeri missile ka apokdang emergency service building ka nunga kongshi.

Ukrainian mitkar ketdangsur nungi missile khaloktsüba osangbo shia mali.

Ukraine Tir Volodymyr Zelenskyy-ia nisung aliba ki tulu ana tsüngta apok, ta Telegram nung ashi.

"Tia maka ki raksaba telung nung nisung lir. Ano maneni Russia-i parnok ya kiralongrar linük ka ta sayuogo," ta Zelenskyy-i zülü.

Moscow-ibo par sepaitemi civilian alidak mamak ta ashir.

Social media nung noksa prokshiba nung rescue team tem ki raksar alidak mapa inyakba angur, ki ki yangluba

osettem prokshia liasü.

Russia nungeri tayimtsü amshia Ukraine amakba ya tawa tali tesashiba kumogo aser yamaji alinüka rakzuka arudag.

Honibarnü Russian ketdangsur temi ashiba agi, Ukraine nungeri Belgorod nung bomb khaloktsüba mapang nisung ana asü. Belgorod ya arütsü nung aliba tesem ka lir aser yangji tan hopta aiben maka arur. Tan hopta yangji aliba yimtsüngtem nung amakdang asür nisung tenet jungogo.

Kyiv-i Moscow indang occupation forces anema meyiper raratsü renemba mapang lir ta ita aika jembia arur aser February 2022 nungi tenzüka Russia-i amakdang rakzükdaksüba litsü tanaben agitsü meranger.

US den raranungbo tesama tulu asütsü: China

Singapore, Aami/June 04 (Agencies): China indang defence minister-i ashiba agi, US den rara tenzükra alima atema tesama tulu asütsü, aser par linüki rara madoktsü asoshi jembishinü kaner.

Security summit ka nung General Li Shangfu-i ashiba agi, "linük kari" nok-nü tsütsü toktepba tali tamajungba aser tesashiba kumdaktsür.

Ajisüaka China aser US atema alima ya onsara tulu aser tashi tulu aliba linük ana tsüngta tangatetep alitsüla, ta pai ashi.

Taiwan strait nung US warship ka anasa Chinese destroyer ka lendong timtem ajurutsüsa senzü, ta US-i shia liasü.

US-i mitkar o mitkar tsüngta jembishinü akatsü asüngdangba Beijing-i magizük aser ibai Russia nungi nok-nü aliba mechi 2018 küm US-i Gen Li nem sanctions agüja aliba mechi lir.

Singapore nung Shangri-La Dialogue nung jembidang, "China aser US ya system balala lir aser danga lenmang aisü nung balala," ta Gen Li-i ashi.

Shangri-La Dialogue ya Asia-Pacific region indang küm shia amenba security senden ka lir.

"Tang Cold War tangatetba tali kumdar, aser security tsütsü tebilemetsü tuluba akumer," ta pai ashi.

"Mesüshitsü aser danga linük anishitsü melena kati ka akumtsüboteptsüla," ta Gen Li-i ashi.

March ita defence minister akumba sülen ibai Gen Li asoshi international jenjang tulu nung jembiba mezüngbuba alitsü.

China-i Taiwan ya par indang ta jembiba aser South China Sea nung litsülika tsütsü mangatetep adoka aliba densema ken o aika nung Washington aser Beijing küm aika mangatetep adoka arur.

Honibarnü US navy ajanga ashiba agi, Canada nungeri rong tem den Taiwan Strait nung süyitepba mapang American warship ka anasai China indang destroyer ka yimya meshidaki ajanga ao.

Linük anaprongi lendong ajurutsüsa metetsümonga rara mesür, ta China-i aija liasü. US aser Canada-i ashiba agi,

international law agi melaba ama parnok tzüyim nung senzüa liasü.

Taoba ita Pentagon-i video ka sayaba nung China nunger jet ka South China Sea nung US surveillance plane anasa yima ao aser ibai menüngdakba nung tashiyim amshia yimzüba lir ta ashi.

Mitkar tem tsüngta jembishinü akatsü memolungba mechi Singapore summit nung US Defence Secretary Lloyd Austin-i China arüja liasü.

Hokulbarnü iba senden tenzüka chiyongba mapang Gen Austin aser Gen Li salem süa o tatsüka jembia saka tongtipang onüktem jembiba masü, ta osang ajanga ashir.

Linük ana indang mitkartem tsüngta jembishinü akatsü asoshi US-i Gen Li nem sanctions agüja aliba agientsüla, ta China nunger delegates kati iba senden nung osangbener dang ashi.

Linük ana tsüngta yimtenren tsütsü mangatetep adoka liaka US state department ketdangsur ka ken o balala jembitsü asoshi Beijing nung arua lir.

Somalia nung al-Shabab-i Uganda sepai 54 tepset

Kampala, Aami/June 04 (Agencies): Somalia nung African Union peacekeepers tem aliba tesem nung al-Shabab teloki amakdang Uganda sepai 54 süogo, ta Uganda Tir Yoweri Museveni-i sangdong.

Somali yimtiba Mogadishu nungi southwest tsütsü kilometre 130 shi pilar Bulamarer nung sepaitem aliba tesem ka al-Shabab reloki sapanger hopta ka lir Museveni-i Deobarnü iba osang ya sangdong.

Iba telungpur telok yagi May 26 nung takum bendanga agütsür bomb pokloksü aser iba mapang sepai 137 tepset ta ashi.

Uganda People's Defence Forces (UPDF) temi iba tesemji al-Qaeda den sendaktepa aliba telungpur telok ket nungi tanaben rakzükogo, ta Museveni-i Deobarnü ashi.

"Asen sepaitemi tasü ita aser saksalema rara aser Mongulbarnü tashinung base tanaben agitet," ta tiri ashi.

Uganda nungera süogo ta

taoba hopta Museveni-i ashi saka sepaitem dak amakba indang osang tejangja mashi, shirnok African Union Transition Mission in Somalia (ATMIS) nung tenzüker.

Somalia nung anüolen linük temi yariba sorkar melentsü meranga al-Shabab teloki 2006 nungi rara arur aser parnoki Islamic ozüng tessashi nung ajemdaker par sasa yimsü asütsü meranger.

Tir Hassan Sheikh Mohamud-i election nung takok anguba sülen sorkari iba telungpur telok den kanga sashia rara tenzüka Somali nung tesem tuluka rakzükogo.

Saka al-Shabab teloki tang tashi sorkar, shishilempadak aser mitkar amaktsü akoker.

Mogadishu-i telungpur den raraba nung Nairobi-i shilem agiba mechi parnoki kidanger Kenya linük nunga amaker.

ATMIS nung sepai 22,000 lir, aser 2022 küm AU Mission in Somalia (AMISOM) melenba sülen parnoki Somalia indang sorkar yaria rara arur.

Nigeria tir inyaktsü Bola Tinubu shimogo



Abuja, Aami/June 04 (Agencies): Africa nung democracy tulutiba, Nigeria nung tir inyaktsü asoshi linük yimtiba, Abuja nung sentong ka agia shimogo.

Arishi küm 71 tain Bola Tinubu-i teimla tasen agütsütsü nangzüka February ita election nung takok angu, saka pa jakdang rongsenketzüng aser security tsütsü tayongzükba tesashi lir.

Osettsüset nung jenjang atuba, sentsü tali akumba aser senotsü mechitsü atema nisung apuba amala tali akumba mapang pai kümsük ana tir inyaka alisang Muhammadu Buhari menden melener.

Tinubu-i takok anguba anema pa den tokteper anati court nung ken o benoka lir.

Iba election result ya yanglusa ta parnoki ashir.

Ajisüaka küm ti tashi yimsü süa arur taküm election nung metoktepsang tir tejenbai result ya tejangja aser election ochishia tim yimya nung agiogo ta ashir.

Tinubu tir akumtsü tenzüngzüktep agiba sentong nung continent ajungalen nungi tongtipang nisungtem Abuja nung adenshi, anungji iba sentong ya khenyongi balaka ta sayur.

Tinubu benjongtsü mapang kangabo mali. Nigeria nungeri temi kanga kera mapa

tenzüksü imlar.

Küm 18 jungnüa nung osettsüset jenjang tang tematiba nung lir, nisung asem nung ka mapa mongui lir aser tongtipang totzü industry nungi totzü adokba ajema akumer.

Pa nem vote magütsürtem mesüzüksü asoshi pai mera kanga kera agitsüla.

Tinubu ya Lagos indang governor ama kümsük ana inyak aser par iba yimti shia arudaktsü, anungji pai linük tia meteta lir.

Nisung million 200 dak tema aliba linük anitsü asoshi pai technocratic yimya amshitsü aser kanga junga shisadangtsü, ta pa den sendaktepa alirtemi ashir.

Ajisüaka pa anemer temi pa dak tamang makar aser tashiyim amshia Lagos renlokdaktsüba tashi samaogo ta ashir.

Election agiba sülen pa bendang limai anaben ao, anungji pa temang ang majung asü ta bilemer. 2021 küm pa London nung ita aika munga temai madokba tashidak ka anepalua liasü.

Saka pa aitsüba atema süoki ia magizük aser tir inyaktsü atema Olympic asayar ka temang ama alitsü menüngdak ta ashi, aser par telokia nüburtem dang arishi küm 80 tain US Tir Joe Biden ya pa dang tabo lir ta ashi.

Ajisüaka February ita agiba tir election nung tanabuba aser tasembuba jenjang nguteter Atiku Abubakar aser Peter Obi nungeri ken o benoka aliba nung pa aitsüra Tinubu ya mapang talangkabo yimsü mesütetsü.

Election tribunal ajanga iba ken o ya Mongulbarnü nungi jembia tenzüksü aser ita trok tsüngta alimai metettsü.



June 4, 2023 : Gaza yimti nung kanga atsükba mapang Palestine nungertem Mediterranean Sea tzükum nung anisüngzüka kazüba noksa ung angur. Gaza Strip nung mopung tatsük aonba nungi anisüngzük angutsü mechi Palestine nungertem Mediterranean Sea tzükum bushir. Palestine nungeri territory ana lir aser aji Gaza Strip aser West Bank alitsü.



June 4, 2023 : Paris Saint-Germain (PSG) aser Clermont na Paris, France nung aliba Parc des Princes nung asayaba sülen PSG nungi asayartemi League 1 title ngur pelatepba noksa nung angur. PSG nungi Lionel Messi asoshi tatembangba asaya Honibar aonung liasü saka iba asaya nung parnoki takok mangu. Season ana tashi asayar iba club nungi Messi aotsüba osang ya iba asaya tenzüksü mapang tatsüka lia PSG ajanga sangdonga liasü. Messi-i PSG nungi match 75 asayaba mapang goal 32 agüja liasü.

Karim Benzema-i Real Madrid yutsütsü

Madrid, Aami/June 04 (Agencies): Karim Benzema ya küm 14 tashi Real Madrid club nung lia arur tang yutsütsü lir.

Ballon d'Or sempet angusang striker ya 2009 küm Lyon nungi Spain nung football club nungya arua aden aser season atemba mapang free transfer nung aotsü.

Benzema ya Real Madrid den contract zülutepba nung ano küm ka anünga lir, aser pa Saudi Arabia-i aotsü renema lir, kong Al-Ittihad nungi maongka tajung agüja lir, ta Spanish football journalist Guillem Balague-i ashi.

Arishi küm 35 tain Benzema ya Madrid nung lia Champions League ponguben aser La Liga title pezüben koka lir.

Benzema ya Al-Ittihad den küm ana atema züluteptsü, ta Saudi sorkar meyong Al Ekhhariya television station ajanga Deobarnü ashi.

Real Madrid coach Carlo Ancelotti-i Franc nung international jenjang nung football asayasang ya taruba season tashi asayatsü imlar, ta Honibarnü shia liasü.

"Benzema ya yimya aser wadang nung tatishitsü ka ama lia arur aser asen club jenjang pai sayur. Pa tarutsü asoshi telemtetba agitsü

temeden pai aazükogo," ta Madrid ajanga Deobarnü sangdong ka nung ashi.

Anogo ana nung Madrid yutsütsü jangjatsür asayar asem rongnung Benzema ya ka lir aser ano kasa club nungi Eden Hazard aser Marco Asensio na tan meyi nung club yutsütsü, ta Honibarnü sangdonga liasü.

France nungba ya Real Madrid nungi major titles 25 tashi nguteta lir, koba club asoshi otsü ka lir.

Benzema ya Ballon d'Or sempet angur ka lir aser pa lenisüba kübok taoba season nung Champions League title ngutet aser iba tetoktepba nung goal 15 tashi agüja liasü.

Real Madrid nungi pai Club World Cup ponguben aser Copa del Rey takok marok asemben nguteta lir.

Benzema ya Madrid asoshi asaya 647 nung asayaogo aser iba club nungi all-time goalscoring list nunga jenjang tanabuba nung goal 353 agütsür lir, kong Cristiano Ronaldo-i dang goal ka agi tali agüja lir.

Pai Madrid asoshi tatembangba asaya Deobarnü Athletic Bilbao den asayatsü, koba 2022-23 La Liga season nung asaya tatembangba alitsü.

"Madridistas aser alima tesem ajungalen aliba fans temi pa football asaya jangratema

repranga aruogo, aser iba yongji asen club nung aser alima nung football tsütsü asayar tajungtem rongnung pa ka akumer," ta club ajanga ashi.

"Real Madrid tanga-tesüa par ki asütsü aser pa takum nung mera tasen kati ayaoka aidang pa aser par kibong asoshi tajungtiba südakjang ta moatsür."

Deobarnü asaya parnoki kokra La Liga nung Madrid ya jenjang tanabuba nung tembangsü, saka champions Barcelona dang points 11 agi tajemba lir aser Manchester City-i semi-finals nung tsükdaksüba sülen parnoki Champions League title soita meyutet.

Item tejashi ajanga Santiago Bernabeu nung temelenshi aika adoktsü amai olulu angazük aser item rongnung Benzema pilaba ya tongtipangtoba lir.

Real Madrid nungi tongtipang asayar aika club yutsür aor asünung straker tasen anioxtsü nungdaker.

Balague-i ashiba agi Spanish striker Joselu ya Espanyol nungi loan nung arutsü akok, aser Ancelotti-i Tottenham striker Harry Kane kanga sakloker. Taruba summer nung Real Madrid-i Paris St-Germain forward Kylian Mbappe anir arutsü sentong yanglur.



London nung aliba Wembley Stadium nung Manchester City aser Manchester United tsünga English FA Cup final asayaba nung takok anguba sülen Manchester City coach Pep Guardiola-i trophy amer pelatepba noksa nung angur. Iba asaya nung Manchester City-i 2-1 agi akok. Season ka nung tongtipang asayamung asem (Premier League, FA Cup aser Champions League) nung takok angutsü asoshi Manchester City ya asaya ka dang anünga lir. Manchester City ya June 11, 2023 nü Inter Milan den Champions League final asayatsü lir.

2 buba Women's Champions Trophy tanü nungi tenzükter

Dimapur, Aami/June 04 (TYO): 2 buba Women's Champions Trophy (cricket) June 5, 2023 nü tenzüksü aser June 10, 2023 tashi asayatsü.

Iba tetsürtem cricket asayamung nung team trok nungi shilem agitsü aser itemji Saramati Warriors, Tiyi Strikers, Japfü Dazzlers, Terogvu Titans, Pauna Queens aser Puliebadze Slingers alitsü.

Nagaland nung tetsürtem

asoshi cricket nung putu tasen ka tenzükba arua reprangtsü ayongzükter, ta Nagaland Cricket Association ajanga cricket aser saisapong meimertem jaoka liasü. Women's Championship Trophy ya Nagaland Cricket Stadium aser Sovima Cricket Ground nung asayatsü.

June 10, 2023 nü iba asayamung final ya Day-night yimya nung Nagaland Cricket Stadium, Sovima nung asayatsü.

French Open 2023: Novak Djokovic quarter final tongogo

Paris, Aami/June 04 (Agencies): Deobarnü Novak Djokovic-i straight-sets nung Juan Pablo Varillas madak takok ngua Grand Slam quarter-final 55 buba aser French Open nung otsü yanglua quarter-final 17 ben buba tongogo.

Djokovic ya Roland Garros championship asem buba aser teburtem kisung asayaba Grand Slam title 23 buba arishir, aser pai rank 94 buba nung alisang Peruvian nungba madak 6-3, 6-2, 6-2 agi takok angu.

Serbia nung arishi küm 36 tain Djokovic ya Paris nung 2016 aser 2021 küm champion liasü aser semi-finals atema seed 11 nung alisang Karen Khachanov den asayatsü.

Djokovic-i Russia nung Karen Khachanov den 9 ben asayaba

nung 8-1 agi timba koka lir aser tena tesüsa asayaba ya 2020 küm French Open nungsa liasü.

"Ni taoba mapang pa (Juan Pablo Varillas) den kodanga masayadang. Pa ya clay court nung takotet ta meteta liasü aser ni takok angutsüla. Tan hopta ni asayaba nung iba ya tajungtiba liasü," ta Djokovic-i iba asayamung nung last-eight jenjang 14 ben ajangzükteba sülen ashi.

Paris nung pai otsü yanglua quarter-final 17 ben asayaba indang jembidang, "Iba record atema ni nüma atanger. Ni kanga meranga asaya aru aser maneni asayatsü temolungtetba lir," ta ashi.

Iba asaya nung Djokovic aser Varillas tsünga ghonda asem ser minute 36 tashi asaya liasü.

French Open nung tetsür tarep asayar ana disqualify sütsü

Paris, Aami/June 04 (Agencies): Japan tsür Miyu Kayo-i ball girl ka dak ball agi aonba sülen French Open tennis asayamung tetsür tarep asayar team ka disqualify sütsü.

Iba asaya nung Kato-i ball ka court alema ball girl ka tsütsü yokka agi la dak tapubang nung aon aser la tim atemba ajitet.

Iba mapang umpire ajanga Kato nem tekum dangtsü agütsü, saka lar opponents Marie Bouzkova aser Sara Sorribes Tormo nati ashishiba sülen disqualify sütsü.

Kato ya nüktzü yima court yutsür ao aser la den külemi asayar Indonesia tsür Aldila Sutjiadi-i mesüzüka liasü.

Japan-Indonesia team ajanga court nung French Open ketdangtsür dang mepishi aser ibai asaa inyakba masü ta ashi aser Kato ya ball girl dangi oa tatok meshia liasü.

Court nung ketdangtsür kati iba tatalokba ya 2020 US Open nungi Novak Djokovic disqualify sütsüba den medemdanga liasü aser "Nai nisung kar dak kongshia parnok yirutsüra, ibaji nü khuret lir. Nai asaa mesüaka iba mapa atema na sa tai asütsü," ta ashi.

Czech tsür Bouzkova aser Spain tsür Sorribes nati iba asayamung round tasembuba

nung set mezüngbuba ya 7-6 (7-1) agi koker liasü aser tanabuba set nung 3-1 agi tena tajemba nung lia iba ya ataloka liasü.

Seed 16 buba nung alir ana disqualify sütsü telemtetba agiba asoshi terepranger temi mepelai ola adok aser tena court nungi aodang teka malokja liasü.

Asaya atemba sülen Sorribes Tormo tenati umpire dang ashishiba indang Bouzkova-i rateta ashi. "Ibai tasak lir. Tetsürla minute 15 shi jepa liasü. La ajepba aser la temang nung timtemba manguba ajanga umpire ajanga tekum dangtsü agütsü südi," ta lai ashi.

"Ball ya indang-indanga la dangi ao aser tetsürla jepa liasü, anungji onoki la dang junga reprangshitsü ashi, ball ya tanemi aoba masü. Onoki tena (Kato aser Sutjiadi) dang ibai kanga tia maka atalokba lir ta shiogo."

International Tennis Federation (ITF) ozüng nung warm-up densema asayadang asayar temi tashiyim agi, lendong ajurutsüsa mesüra ain aita asayadak tennis ball nung mazüksü, memetsütsü mesüra mindoktsü, ta shia lir.

Asaa court nungi ball zükteta yokba, timtem ajurutsüsa mesüra junga mapidangi ball nung azükba ya ball dak tashiyim amshiba lir, ta ITF ajanga ashir.

BILEMDANGANG

"Tia tensa balala den liromedema alitsü kanga tongtibang."